

## COMUNICÂT STAMPE

### MUSICHE: SUNS 2012, PRONT IL BANT PAR MUSICISCJ E AUTÔRS

Udin, ai 4 di Avost - La ARLeF, Agenzie Regionâl pe Lenghe Furlane, e à publicât il bant par partecipâ a SUNS 2012, il Festival de cjançon intes lenghis minoritaris europeanis che al fâs part dal circuit musicâl dal Liet International.

Il festival, rivât ae cuarte edizion, si davuelzarà tra la fin di Otubar e l'inizi di Novembar dal 2012 a Udin e si conferme un dai events musicâi di plui grant interès, come che e dimostre la grande partecipazion di artiscj che e cres in maniere costante an daspò an: te edizion 2011, davuelte a Falera, in Svizare, a àn partecipât 47 cjançons cjantadis in 12 lenghis diviersis.

SUNS 2012 al è indreçât ai artiscj residents in Italie, Svizare, Austrie, Slovenie, France. Lis lenghis ametudis a partecipâ a son Furlan, Sart, Todesc, Albanês, Franc provençâl, Francês, Ocitan, Sloven, Ladin, Catalan, Cravuat, Grico, Romanì (pe Italie), Romanç (pe Svizare), Romanì, Cravuat, Sloven, Ongjarês, Cec, Slovac (pe Austrie); Ongjarês, Romanì, Talian, Todesc (pe Slovenie) e Ocitan, Franc provençâl, Catalan e Romanì (pe France).

I doi artiscj che a vinçaran SUNS a vignaran ametûts ae fase finâl dal LIET INTERNATIONAL ([www.liet.nl](http://www.liet.nl)), il plui impuartant festival de cjançon in lenghe minoritarie a nivel internazionâl che si davuelzarà a Xixón - Gijón tal Principât des Asturiis (Spagne) il prin di Dicembar dal 2012.

Par partecipâ al covente mandâ il propri materiâl dentri dai 3 di Setembar dal 2012. La schede di partecipazion si pues discjamâle dal sît internet [www.arlef.it](http://www.arlef.it). Dongje de schede di partecipazion il partecipant al scuén presentâ: une cjançon, su cd o mp3; il test e la sô traduzion par inglês e/o talian; une curte biografie. A vignaran ametudis dome lis composizions originjâls che no an a ce fâ cui repertoris tradizionâi des regions di divignince.